

Kristiante hi mite janpuina dawngtu tur ni lovin midangte janpuitu tur kan ni. Mi dangte janpuu tur leh thlpeik lamah pawh tacinham hnena pek tur kan neih theih nan kan taihmak a, kan kuta rim taka thawh chhuaka intodelh phawt tur kan ni. (II Kor. \*:7& Eph. 4:28)

# KRISTIAN THALAI

NOVEMBER  
2012



Kristian Thalai Pawl Chanchinbu Thla tin chhuak

Vol IV No. 9



- Kan mamawh ber **Isaa**
- Hnathawh changchanga **rilru pathmang dik**
- Fashionista : **Kristian Thalaita nihna**
- Tanlai khawvela **KTP** te mamawh **Kristian Chhangkua**
- In bihchian ngai **KTP**



*Kristian Ṭhalai Pawl chanchinbu thla tin chhuak*

1970-a chhuah ṭan ■ Kum 42-naa wawi 10-na ■ Chhuah tawh zat : 409

**Editor :**

R. Lalhmingshanga

**Joint Editors :**

T.Upa Lalhruaizela  
Pu Lalmuanpuia Hrahsel  
T.Upa Lalremsiama  
Dr.H.Lalthanzara

**Manager :**

Lalmuanpuia

**A lak man :**

Kum khatah - Rs. 50.00  
Copy khat - Rs. 4.50

*Thu chhuah tûr nei chuan  
Editor, Kristian Ṭhalai, Synod  
Office-ah thawn tûr a ni a; a la  
duh chuan KṬP Office-ah a man  
pêk lâwk a ngai.*

**Office Phone : 2326372/2335821**

**Visit us :**

[kristianthalai@yahoo.com](mailto:kristianthalai@yahoo.com)

[cktp.blogspot.com](http://cktp.blogspot.com)

[www.facebook.com/centralktp](http://www.facebook.com/centralktp)

**KRISTIAN ṬHALAI PAWL**

**Thupui**

Rawngbawl tûra chhandam

**Thupui inngahna**

Ephesi 2:10 Thil ṭha ti atán Krista  
Isuaah chuan siama awmin, ama  
kutchhuak kan ni si a, chu thil ṭha tih  
chu kan awmna tûrin Pathianin a  
buatsaih lâwk a ni.

**Thil tumte**

1. Isua Krista rinna leh amah anna  
kawnga ṭhalaite hruai.
2. Kohhran kut ke ni tura ṭhalaite  
buatsaih.
3. Kohhran hnathawh tihpuitlin.
4. Krista Chanchin Ṭha puan darh.

**A CHHUNGA THU AWM**

1. Kan mamawh Isua ... .. 4
2. Hnathawh chungchanga rilru put hmang dik ..... 8
3. Fashionista : Kristian ṭhalaite nihna... .. 12
4. Tunlai khawvela KṬP te mamawh Kristian Chhungkua... 15
5. In bihchian ngai KṬP!! ... .. 18
6. Sulhnu ..... 21
7. Hruaitu chanchin ... .. 22

---

Editorial ... .. 3	Hringlang tlâng... ..24
Rimâwi ... .. 26	Hrisêlna ... .. 27
Hriatzauna ... .. 29	Kantu ... .. 32&33
Keimahnî ... .. 34	

---



## KOHNA

*Rawngbawol tura chhandam thalaiten Lalpa kohna kan dawn hi engtin nge kan chhan thin le? Kohna kan hmuh dan leh hriat dan a inang thei lova, eng pawh ni se Lalpan ringtu thalaite hi a rawngbawol turin min ko a ni. Kan beisei leh rin dan ang hian Pathianin min ko thin lo, mahse eng kawngah nge ka tangkai theih anga a rawngbawol zel tur hian engtin nge kan inbuatsaih zel ang tih hi kan ngaih pawimawh tur a ni. Eng thil emaw ti tur hian min ko thin a, ngaihtuahna leh finna leh chakna min pek te a rawngbawolna atan hmang turin min duh a, mahse min kohna kan ngaihlala lo fo thin. Pathian kohna hi kan chhan let a, kan inpek nasat poh leh a hlawkna teltu chu kan lo ni reng zel si.*

*Thalaiten Pathian rawng kan bawlnaah te, eizawonna hmunah te mawhphurhna tam tak kan nei thin, heng kan tih tur kan hmaa awmte leh rawngbawolna peng hrang hrangah te, amah fak chungga kan hlen chhuah zel a va tha em. Kan peih loh leh chak vak loh zawngah te Pathian kohna kan dawng leh tlat thin, a ngaihna kan hre lo va, mi dang tih atana dah mai te a awl hle, tun dinhmunah Lalpan a hmang duh che a, khatiang thil ti tur khan a ko che a, i beisei leh ni se i tih i rilru ang khan Pathianin a ko fo lo che a, i duh dana a rawng i bawol a phal lo va, ama duh dan zawka che chhuak turin a ko che a, chuwangin Lalpa thu ngaichang ila, a kohna chhang thei turin thalaiten tan ila thar sauh sauh ang u.♦*

## KAN MAMAWH BER ISUA

(Rom 13:11-14, Tita 2:12-13)

— P.C. Vanneia, Chhingchhip

**M**amawh leh duh neih ve tum reng renga kan buaina khawvelah hian mi tinte hi mawngvawmba ang maiin kan hmanhlel a. Dam chhung khawsak ngaihtuah a ÷ul a, kan ei in tur te, silh leh fen, kan inchei mawina zawng zawng te bansan ngawt theih a ni lo. Khawvel changkanna ÷hang chho zel milin kan nunphung kan rem mil ve zel a ÷ul a. Changkanna kawnga kan intlansiakna hian rualelna mak tak takah min hruai lut a. A dik a dawp pawh thliar hman lovin, rahbi rualrem kan rah ve theih nan kan phe suau suau a. Chu chuan chhungkaw nun a nghawng a, Kohhran thlarau lam nun a khawih thleng a, vantlang nun zia a thlak ta nawk nawk a ni ber.

Mihring khawsak dinhmun lo ÷hang zel hian mi tin nun hi min sawi nghing dual dual a. Chu chuan Kohhran chhungril nun pawh a nghawng a. Pathian ngaihhlutna leh ngaihsanna a tlahniam a. Van lam thiltihtheihna leh thlarau thianghlim kaihhruaina ai chuan khawvel thuan thil

'Technology' hrang hrangte chuan kan nunah hmun sang a chang ta zawk a. ÷ha zawk nia ka hriatah zahpah reng nei lovin kan tlan buan buan a. Hlimna tura kan ngaihah kan tlan suau suau a. Hlawkna tur a nih chuan sum thianghlim leh thianghlim lo pawh kan thliar fim hman tawh lo. Kan mamawh chhanna ni turin kawng hrang hrang kan dap a; mahse, 'hei ka hmu chhuak ta' ti fak erawh sawi tur an awm lo.

Ringtute hi rethei reng tur em ni kan nih? Changkang lo tur reng em ni kan nih tih zawhna a awm thei. Lalpa Pathian, Jehova betute hi ring lo mite aia hausa tur kan ni e. Hausa kan tehna fung erawh a dang tur a ni ang. Eng vangin maw.. Keini chu Van lam mi kan nih avangin khawvel hausakna lang thei hi kan tan a ÷ul ber lo fo. Pathian hmel a hliah a, malsawmtu aia a malsawm bungrua leh chhepchher kan uma kan bosal hi Pathian hian a hlau a. Amah ringtute tan chuan hmangaihna avanga thununna hi a lo lek mai zawk a ni. Chu chu mihring nun hian a

hrethiam phak lo a, a lo hah phah hle thin a ni. Tun tumah hian thil dang zawng zawng aia kan buaipui tur leh kan mamawh, kan nun zawng zawng mamawh chhanna Isua chanchin kan zir ho dawn a ni.

### 1. Hausakna thuruk :

Hausak chak lo hi kan awm awm lo ve. Mahni tawk te teah, chu chu... kha kha.. nei ila chu aw...tia hisap leh ruahmanna nei fir fer kan ni theuh ang. Mi thil neih ang kan thlir a, kan thil neih kan en let a, duh tawk lovin awh vena rilru kan pu nghal a. Kan neih tawh lam hi chuan kan rilru a tibuai ber lo fo a, kan neih loh kan awh si hian kan nun hi hahchawl loah a siam fo. Hausa ve nih hi kan chak a, kil tin kil tang kan dap khawm a, kan tham khawm buan buan a, mahse, kan nun erawh a hlim chuang lo fo. Miin Bike, an mamawh atan an lei a, mamawh ve lem lo paw'n itna avangin kan tuaka, kan ngen a. Lei ve ta chenga chhungkuaa lungngaihna thlentu a ni leh fo. Top up man pawh la thawk chhuak zo lo thlengin Mobile phone- kan inhum siaka, nu leh pa ipte zen ruahpui thak khawpin Phone Chhass kan la nei zui. Tangkaipui ai mahin chhiatpui hi kan tam zawk awm asin. Film duk dak lo pui puite awlsam tak takin kan

thel darh a, a hmei a pa pawh sawi lovin kan pai pawn fur hlawm a. Chungte chu Biak In-ah kan pai luhpui leh a, thlarau lam boruak tlak that hi chu a har viau ang. Bungrua leh hmanrua tam tak kan duh hi chu kan mamawh pawh hi a ni vek lo a. Incheimawina (fashion) chi khat atan kan hmang ber zawk.

Hausakna leh changkanna uma kan phet suau suau lai hian, Isua rim reng reng hi a lo nam lo ang tih a hlauhawm hle mai. Kan duh leh mamawh te, kan phak loh lutuk thleng thlenga neih tuma kan beihna khawvelah hian lungawina kim hi kan hmu chhuak chuang emaw ni chu le...! A inngahna bulthuma Krista hmang lo chhungkua sawp chhe ta an va tam em... Krista tel lo sum pei punna hlawk uma hausu tlu chhe leh ta te, Krista zahna nei hauh loa sawrkar hnathawk zuih ral leh ta te, Krista tel lo ro sum leh pai khawl khawm a, ro khawmtu nei mumal lo a thamral leh ta pawh an tam ta. Aw le...kan chak ber hausakna chu eng hi nge maw lo ni ta ber ang le..? Eng hi nge maw hausakna thuruk kan tih tak chu le..? Krista neitute hi Khawvela hausu ber chu an lo ni. Khawvel retheihna hian phuar vel thin mah se, hausakna neitu Lal Krista chu an neih tlat avangin an chan tawk apiangah

an lo lungawi tawh mai a lo ni a. *Ka lungawina Krista a ni, ka mawina leh ka thianghlimna tiin an lo zai veng veng mai a ni.* Khawvel cheimawina bungrua hi nei ve pha lo mah se, *"Lawmin ka puang zel dawn, ka damna Krista Kraws chanchin hi, sawi tur leh chhuan tur reng ka nei lo; ka damna Krista Kraws chauh lo chu"* an lo ti thei ta a nih chu. A ni, chu ngei chu a ni Hausakna Thuruk chu... Aw... han chang tlang vek thei ila a va duhawm em.

## 2. Chawlhna kim Isua :

Mi tin mai hian han chawlh hahdam siai siai mai hi kan chak vek a. Kan nun hlimna tur leh nawmna tur lam nia kan hriatah chuan kan tlan hlawk hlawk thin. Nun ning leh beidawng ten chawlhna nia an hriat Zu, Drugs, Kanja, No. 4 etc. ah hlimna an zawng a. Nulat tlangval inhip tawna avanga nawm chenna sosang te chu chawlhna emaw tiin an tlan baw. Sum leh paia hausakna hian hlimna min thlen dawn emaw tiin mi tam takte chuan thahnemngai takin an bei baw a. Chung zawng zawng te chuan chawlhna an zawng a, hlimna an zawng a ni. Pathian anchhe lawh khawvelah hian hlimna reng reng hi a lo awm lo a, hlimna tura siam pawh a ni hek lo; hrehawm taka kan

awmna tura anchhedawng khawvel a ni miau a. Ruih theih thil avanga hlimna zawngtuten an ruih chhung bak hlimna an hmu lo a, nguina leh manganna ten a lo hmuak a, a hmuaktu pumpelth nan a ngai leh ngaiyah an kual an kual a. An taksa pawhin tlin loh chin a nei a, thihna seol ka chuan a lem zo ta thin a ni.

Kan nui baw baw a, rei lo teeth mangannain min tlak buak leh a. Hlim ni hmel kan hmu tawh dawn lo emaw tih tur khawpa chhah lungngaihna leh thahna kan taw a, lawmna kaw l a lo eng leh mai baw a. Chu chu khawvel inlumlet dan chu a ni a. Chawlhna tak tak a awm lo ve. Chawlhna tluantling duha nun hlimna tak tak duhtute chuan Isua pan mai hi hlimna a ni a. Isua pantute hi an dam chhung ni atana inchhir an la awm ngai lo. Chhungkuaah hlim zo tawh lo kan awm em? Ruih theih thil avanga nun hlimna zawng a bawih beh tlat tawh kan ni em? Nge,.. retheihna avanga beidawna ruama thu mekte kan awm em? Chung zawng zawngte chuan Isua Krista, chawlhna kim hi rawn pan ve ang che u. A hnen kan pan ngam hun hun hi kan nun hahchawlhna tur chu a ni. *"Manganna ka tawhte zingah, hrehawm taka ka awm laiin; ka ngaihtuahin ka lo lawm thin,*

*Nangin mi ngaituah thin*" tiin hlim takin i lo zai veng veng tawh dawn a ni.

### 3. Buaipui tham Isua :

Ṭhangtharte khawvelah hian kan Isua hi hralh a kal lo telh telh niin a lang ṭan. A aia buaipui hi kan ngah hle mai. Ṭhut khawm titi phunglengah phei chuan a chanchin ngaihnaawm hian sawi a hlawh tawh lo hle. Mahse, thil dang zawng zawng aia buaipui manhla a ni si. Mi tam takten Isua avanga kan tawrhna leh channa an hmuh hian hlawk loah an ngai a, a phena nun thuhruk thinlunga par chhuak hi an hmu pha si lo. Isua chanchin buaipui hman loa insawite hian Party Committee mai mai te hi an ṭhulh ngai lo a. Inkhawm buaipui hman lo intite hi T.V (Television) hmaah chuan hun zalen tak an nei leh si. Rei lo te inkhawm pawh ning ṭhin khan tlaivar dawn dawna hmelhriat ve hauh lohte inkhel hmaah chuan nghate rēp ang karin kan meng leh thei tho si a. Bible bung khat pawh chhiar hman lo intite pawhin zan khaw tairek thleng thlengin SMS chu an chhu peih tho bawk a.

Hawh u... Isua hi i buaipui luai luai mai teh ang u. Kan lo

buaipui avanga he khawvel tehna hrui hnuai lamah miin min lo dah a nih pawhin, "*Ka rina chu ka hria; min thlahthlam ngai dawn si lo a*" tiin vuan tlat mai ila. Kan lo buaipui avanga ṭahna ruam kan zawh hunah pawh tuihna thar kan hmu zel ang. Isua buaipui tawh laileng te hi chu an inchhir ngai lo asin. "Hriat chian leh zual che hi ka va duh em" tiin hma lam an pan sauh sauh a. Tunlai thil awmzia hi chhut chungin insum tak leh Pathian ngaihsakin an hun pum chu Isua tan an hlan ṭhin. Kohhran hi Isua thisena din a nih zia an hre Chiang a, mi nun darthlalanga hmang lovin Krista chu an nun inenfiah nan an hmanga a. Chung mite chuan *dāk* tik ni an nei tawh lo. Khawvela hlimna zawnga buai ṭhin kan ni em? Isua aia buaipui tam tak nei ṭhin kan ni em? Thlamuang lo taka nun hmanga buai ru riau ṭhin kan ni em? Dam chung khawsak ngaihtuahna avanga buai kan ni em? Aw le..., chung hote chuan Isua hi kan theihna zawng zawngin i buaipui hmasa ang u aw... Hausakna thuruk, chawlhna kim min pe dawn si a.

## Hnathawh Chungchanga Rilru put hmang dik

— Lalthlamuana Ralte,  
Tuikual Branch

**M**izo Kristian thalaite hi hnathawh chungchanga kan ngaih dan a inang lo zungin a rinawm. Thenkhat chuan kan hna/eizawna hi chhungkaw chawmna a nihna chauh kan ngaihtuah mai thei a, a then chuan sum lakluhna a nih vangin thahnemngaihna pawh nei lem loin kan thawk mai thei a, chutih laiin, mahni hnaa tui em em, phur tak leh thahnemngai taka thawk pawh kan tam ang. Eizawna mumal la nei chiah lote pawh kan ngaih dan a dang zungin a rinawm.

Kan eizawna kan ngaih pawimawh dan te, kan hnaa kan inpek dan te inang vek lo mah se eng hna pawh hian (mi dang tana harsatna thlen thei chi a nih ngawt loh chuan) hlutna leh zahawmna a nei vek a ni tih erawh hria ila. Hlim tak leh phur taka, inpekna tak tak nena kan thawh phawt chuan hna hahtlak tak leh hlawk vak lo pawh ni se hna zahawm takah a chang thei tihna a nih chu. Chuvang chuan, eizawna/hnathawh chungchanga kan rilru put hmang, sap tawnga 'work

ethic' an tih leh a kaih hnawih thil hrang hrangte hi ngaihtuah ngun a ngai hle a ni.

### Eng hna nge kan thawh?

Tlangval pathum hian quarry-ah hna an lo thawk mawlh mawlh a. Chutih lai chuan pa pakhat a lo kala, a mal te tein, "Eng nge i thawh a?" tiin a zawt theuh a. Pakhat chuan, "Ihmuh anghian lung kan la a nih hi," a ti mai a. A dang leh chuan, "Hei ka inhlawh a, kar tawpah ₹ 1,200/- ka hlawh dawn asin," tiin a chhang a. Pathumna chuan, "Ti hian heng lung hmang hian Biak In tha tak ka sa mek a nih hi," a ti thung.

Tlangval pathum zinga a hmasa ber hi chuan a hnathawh meklai chauh a ngaihtuah a, a hnu lamin a rilru a luah pha lo. Pahnihna hi chuan a thawh hlawh tur a ngaihtuah a, rim taka a thawh vanga pawisa a dawn tur a hre chiang em em a, Inrinni lo awm tur a lungkham hle a ni. A hnuhnung ber thung hi chuan tuna a thawh meklai chauh a thlir lo a, a pawisa hlawh tur chauh a ngaihtuah hek lo. Zawhna a chhannaah pawh tuna a thawh meklaithe leh pawisa a hlawh turte ai chuan a thawhrim vanga nakina Pathian Biak In ropui tak lo ding tur chu a rilruah a lian zawk hle tih a lang.

Kan hnathawh chungchanga hian a khawi ber khi nge kan rilru put hmang ni ve ang le?



'Hnathawh hi Kristiante tih tur a ni' tih rilru pu chung a thawk thinte chuan hlawhtlinna hmel an hmu thin. Chutiang tho chuan *'Nitin hna tha taka kan thawh hian rawng kan bawol zel a ni'*, tih hi Kristiante zirtirna ziding a ni bawk.

### **Work Ethics chu**

Eng hna pawh thawk ila hlawhtling tur chuan - taimakna te, rinawmna te leh inpekna te bakah mahni hnaa tuina hi a pawimawh hle a, hengte hi 'work ethics' ze pui pawh a ni hlawm. 'Work Ethics' chu hnathawh chungchanga rilru put hmang dik sawina a ni a, mi thiamten hrilhfiah dan hrang hrang pawh an nei nual a, a tawi zawnga sawifiah dawn chuan *'Mahni hnaa inpekna tak tak rilru leh thawhrinna inkawp'* tih a ni mai awm e. Mi tam tak chuan hna tha teh nan sum leh pai hi an hmang fo thin a, sawrkar hna leh hna dangte pawh hi a thawktu hlawh zat leh a behbawm hamthatna awm thei atangin kan ngai hluin kan ngai hlu lo mai thin. Mahse chutiang ngaih dan chu ngaih dan pawnlang tak a nih mai bakah work ethics nen a inkalh tlat a ni.

Eizawwna/hna tinreng hian eng kawngah emaw tal hlutna an nei vek a, mahse a thawktuin a ngaihhlut thiam dan a zirin a hluin a hlu lo mai zawk a ni. Heng bakah hian mahni hnaa hming chhiat leh hming that

chungchanga mawhpurhna la vek ngam khawpa inpekna tak tak rilru hi work ethics chu a ni mai awm e. Mahni hnaa inpekna tak takah chuan zelthelna te, inthlahdahna te, thatchhiatna te hi a leng lo a, rilru fim tak pu chung a ngaih dan nghet tak leh kalphung fel tak neia thawk apiang an hlawhtling thin. Chumi awmzia chu work ethics ngai pawimawh hnam apiang an taima a, an thawk rim a, an hlawhtling bawk thin.

Chuvangin, tuna kan hnathawh dan kalhmang te, kan hnaa kan inpek dan te, hna tha leh tha lo kan thliar thin dante, mahni hnaa kan rintlak/rinawm dan te, hlawh chungchanga kan rilru put hmang te hi ngun taka han ngaihtuah hian 'work ethics' chungchang inzirtir hi kan la mamawh hlein a lang.

### **Mahse fimkhur a ngai**

Hnathawh hi kan dam chhunga kan tih tur a ni a; mahse, mihring dam chhan ber erawh a ni lo. Mihring taksa leh rilru hian ni tin chawlh hahdam a mamawh a, chumi chu ngaih pawimawh tel nachang hriat a tha khawp mai. Khawvela hnam fing leh taima ber pawl Japanese-ho hi an hnaah an inpe thei hle a, khawl ang maiin an thawk mawlh mawlh mai thin a, an taimak rah an seng a, ram hausa ber pawl an nih phah reng a ni.

Mahse, thawhrinna hian nun

hlimna a thlen vek bik lo a ni ang Japan hi khawvela mahni intihlum tamna ber pawl a ni reng thin. Chu mai a ni lo a, mahni hriselna pawh ngaihtuah chang lo khawpa hnathawk nasa, hna thawh rim luat tuar lo a thih phah an tam hle a. Chutiang thihna chu 'Karoshi' an ti a, 'Thawhrim vanga thihna' tihna a ni a, kum tin an rama thihna langsar tak a ni ve ziah thin. 'Karoshi' hi an sawrkar leh corporation te pawhin an buaipui hle a, tlai lama hnathawh ban ruala mahni in lama haw nghal turten an ngen a, mihringin chawlh hahdam kan mamawh zia te an puangzar thin. An taimakna leh an inpekna hi fak loh rual a ni lo.

Eng pawh ni se, mihringte hi rim taka hnathawk tur kan nih rual hian hriselna lam ngaih pawimawh tel hi thil tul tak a ni a, ni tin chawlh hahdam kan mamawh ziah thin. Chu chu Pathianin kan taksa a siam dan atang pawh hian a hriat awm e, kan taksa leh kan fuke te hi hna chi hrang hrang thawk thei turin siam ni mah se hah/chau leh mai thin vek kan ni. Chuvangin, thawh rim leh hahchawlh hi a inkawp tlat tih hria ang u.

### **Kristiante rilru put hmang tur chu (Christian Work Ethics)**

Protestant Kohhran hruaitu hmasate khan hnathawh leh taimakna hi an ngai pawimawh viau a, an zirtirna laimu ber

pakhat pawh a ni nghe nghe. Hei vang hian khawthlang ram hrang hrang zinga siam that kohhranho (Protestant kohhran) tamna apiangte hi hnathawh uar ram an nih mai bakah ram hausa leh hmasawn chak ber berte an ni hlawm.

Presbyterian kohhranin kan dah san em em John Calvin-a khan taima taka mahni hna theuh thawh hi mihring mawhphurhnaah a ngai a, Kohhran siam that bul tantu Martin Luther-a pawh khan khawvela kan awm chung chuan hnathawh hi kan tih turalum (duty) a nih bakah chutianga tih tak zeta hna thawh chu mi mal leh khawthlang tan hmasawna thlen theitu a ni tih hi a ngaih dan a ni bawk. Kohhran siam that beihpui thlaktuten hnathawh chungchanga an ngaih dan hi 'Protestant work ethics' an tih mai chu a ni a.

Sociologist ropui Max Weber ngaih dan chuan 'Protestant ethic' avang hian Europe khawmualpuia siam that kohhran tamna ram apiangin hma an sawn chak bik a, ram hrang hrangte an insumdawn tawn tan tirh lai vel atanga hlawhtling ber berte pawh heng ramte hi an ni, a ti. Kristian tamna ram apiang an thawk rim a, an changkang tlangpui a, Kristian tamna ram rau rauah pawh Protestant kohhran an tamna hmun apiang an changkang bik bawk (the Scandi-

navian ram te, the Netherlands te, Northern Germany te, Switzerland te, the United Kingdom te, Canada te leh USA).

Mizoram hi Kristian hlang deuh thaw awmna ram a ni a, chutah pawh chuan Protestant kohhran tamna a ni leh zel bawk. Chutih laiin, kan hnaa kan inpek dan te, kan taimak dan te leh kan thawh rim dan te hi han chhut ta chiah ila hmun danga siam that kohhran zia ang kan la pu lo hle tih a chiang awm e. Chuvang chuan Bible zirtirna ang leh kan kohhran pate zirtirna angin mahni hna theuhah rinawm a, inpekna tak tak nen taima taka thawh hi kan duty a ni tih hriat a tha hle.

### **Pathian leh a kohhran hlamchhiah loin**

Work ethic kan sawi ruala pawimawh tak mai chu thawhrimna leh taimakna kan buaipuina lamah hian Pathian leh a kohhran hlamchhiah zawngin kan infuih palh hlauh ang a, Pathian thu aia hnathawh/ thawhrimna ngaisangtuten 'Work is worship' (Hnathawh hi Pathian biakna a ni) an tih te hi changchawiin kohhran leh KṚP rawngbawlina hrang hrangte hi hnawk kan ti anga, hmasawna daltuah puhin kan sawi chhe palh ang tih erawh a hlauhawm khawp mai. Chutiang zawnga sawi thin

leh ziak thin pawh an awm ta fo mai. Mahse, Pathian biakna leh rawngbawlina aia hnathawh dah pawimawh hi ringtu nun tibuai theitu a ni a, kan hnam tan pawh hian a him lo ang tih hriat a tha khawp mai.

Zep thu a cheng lo, changkanna te, hausakna te, nawmsakna te kan duha, kan chak a, rualawhna avangin mahni phak tawk tawkah khawvelhmasawna kan um ve yang yang thin a. Hetih lai tak hian khawthlangho ang khuan kan biak Pathian leh a kohhran hlat zawng hian hma kan sawn palh ang tih erawh chu a hlauhawm hle a ni.

Kan nunphung a inthlak danglam zel a, kan thil thlir dan te, kan ngaih dan te a inher danglam zung zung lai hian thawhrimna leh Pathian kohhran rawngbawlina (KṚP rawngbawlina) te hi inhal ta riaua ngaihna a lian mekin a lang. Chutiang karah chuan, thawhrimna leh hausakna hian kohhran a nek pawnglang tial tial a nih chuan khawtlang nun leh chhungkaw inawpna bakah mi mal nun thlengin a tuar ngei ngei ang. Pathian hre reng chung a thawh rim dan te, kohhran thlahthlam lo a hmasawn dan te, inkhawm thin chung a hlawhtlin dan te kan zir thiam a pawimawh hle a ni ♦

## FASHIONISTA : KRISTIAN ṬHALAITE NIHNA

— Rev. R. Lalthlengliana,  
Hailakandi, Assam

**F**ashionista tih ṭawngkam hi kan hmeh hriat vak lo mai thei e. Fashionista tih leh Fashion victim tih chu thil thuhmun a ni a. A awmzia chu entir nan pitar emaw putar emawin tunlai fashion hi an inhmeh dawn leh dawn loh pawh ngaihtuah miah lovin lo inbel ve ta sela, ṭhalaite mit hmuhah leh anmahni rualpui pitar leh putarte mithmuhah ngei pawh a mawi lovin mi nuih an ti za hle zawk thei ang. Chutiang pitar leh putarte chu Fashionista tih tur an ni. Ṭhalaite zingah pawh incheina chhuak thar apiang kan inhmeh leh hmeh loh pawh ngaihtuah miah lova lo neih ve leh lo inbel ve maite hi an ni kan ti thei bawkw awm e.

Fashion lar thar a piang mai, Korean film star-ho incheina a ni emaw, Hollywood star-ho incheina a ni emaw, Fashion TV-a mi kan hmuh thar emaw, ka inhmeh dawn em? He thawmhnaw ha tur hian eng zat nge ka thawh chhuah tih lam ngaihtuah miah lova fashion chhuak thar apiang mai lo inbel zel maite hi Fashionista emaw

Fashion victim-te chu an ni ti ila kan tisual lo hle thovin a rinawm. Fashion Designing zirte pawh hman deuh aṭang khan kan intihhmuh hle a. India ram khawpui lian Delhi, Kolkatta, Bengaluru, Chennai etc. velah te he lam zir ṭhahnem tham tak Mizo an awm ta. Kawng tam takah chuan hmasawwnna a ni a, a lawmawm hle a. Ṭhalaite tan eizawwnna kawng ṭha takte pawh a ni awm e. Tam tak chuan Company-ah te hna an hmuh phahin mahni an intodelh thei a, thil ṭha tak a ni. Chutih lai erawh chuan mi nun dan leh incheina hmu ve leh a rual awt tawkw chauhva Fashion Designing lam te pawh lo zir sil ve, eizawn nana hmang leh peih tak tak hauh si lo, chutiang kawnga mit fing tawkw tura inzir sil bawkw si an ṭhahnem hlein a lang tlat mai. Fashion Designing lam lo zir tawhte ngat chu an mit a fingin fashion chhuak thar an hre theiin neih ngei duhna rilru pawh an pu lian viau ṭhin. Hei hian eng mah tak tak thawkw peih chuang si lo a fashion chhuak thar apiang awhna a hring ni hian a lang tlat mai.

Tunlai khawvelah Information Technology-ah hmasawwnna a nasat tawh avangin duh tawkin TV-ah fashion lam channel ringawt pawh en tur a lo awm ta. Fashion TV-ah Model nalh tak tak ten fashion designer larte kutchhuak

tha ber chauh hain an lo lang a. A nalh ber leh a lang mawi thei ang ber tura an thlan, Fashion show atan bika company siam, mass product aia nalh leh tha an hak avangin a nalhin hak ve a chakawm thei hle a. Chu chu Fashionista emaw Fashion Victim emaw te chuan inspiration atan an lo hmang a, neih ve ngei an tum tawh mai thin. Chu chuan ngaihtuah chiang mang lo leh inhmeh tur leh tur lo pawh ngaihtuah tawh lovin Fashion Victim-te chuan lei ve ngei an tum tawh mai a ni.

Fashion Journalism lama hmasawwnna nasa tak hian Fashion Victim Mizoramah a tipung ni hian a lang tlat bawk. Fashion blog leh Youtube te chu Fashion chhuak thar hriatna hnar pawimawh a ni ta der mai. VOGUE magazine hi fashion magazine lar ber pawl tunlai khawvelah chuan a ni awm e. 1892-ah USA-ah chhuah tan a ni a, hlawhtling chho em em a, haute couture desingner-te chuan an fashion design-te chu an chhuah a, a lar phah hle mai a ni. Tunlai khawvela Fashion capitals lar zualte chu Milan (Italy), New York City (USA), Paris (France) leh London (England) te a ni a. Hengah hian Fashion Week te neih thin a ni a, chutah chuan Model lar leh nalh tak takten fashion designer lar ber berte kut chuak hain an in-show vel thin a ni. Chung zawng zawng chu Fash-

ion TV-ah te, internet Fashion Blog-ah te leh Youtube lamah te kan lo hmu ve zel mai tawh si a. Chu chuan Mizote fashion lamah kan tin loh thil neih tumna min siamsak hlein a lang.

Tun hma zawngin Mizote hi Indian traditional dress leh vai hnam thil hrim hrim ngaisang lo ve tak thin kan ni a. Amaherawhchu, tun hnaiah Fashion World chu Eastern Fashion-in a influence hle a, heng Eastern Fashion ho reng reng te hi an culture nena inzawm vek an ni. Heng ram thenkhat India, Pakistan ang te hi textile industry lamah hma an sawnin an thang chak hle a. Heng Eastern Fashion te hian Fashion World-ah huvang an nei lian ta hle. Red carpet events-ah te ngei pawh celebrity-ten heng India, Pakistan etc. ram incheina Sari te, Bindi te hi an support ta fo mai. Fashion designer-te pawhin an thil design-ah khawchhak lam fashion leh khawchhak lam traditional dress hnuhma lang thawmhnaw an design nasain an collection-ah pawh a tel ta deuh reng mai.

Heng vange pawh hi a ni mai thei a, Mizo thalaite incheinaah vai incheina ang lam leh chutiang lam rawngkai thil chu hmuh tur a tam ta hle mai bawk. Indian deuh tak leh chutiang lam hawi thawmhnaw inbel kan hreh loh chuan kan vai telh telh mai ang tih a hlauhawmin Mizo hnam thil

hian zawi zawiin ral lam a pan mai ang tih a hlauhawm hle in ka hria. Fashion designing kan zir a nih pawhin Mizo traditional dress lam hawi deuh changkang tak tak a design theih ngeiin a rinawm a, kan thiam phawt chuan chung thilte pawh chu khawvela Model lar leh designer larte pawhin an entawn hun a awm ve mai dawn a ni. Mizo thalai fashion designer-te tan lakna tur pawimawh tak a ni awm e.

Kristian thalaite zingah ngei pawh Fashion Maniac kan tam ta hlein a lang a, incheina ringawt atchilh, thil danga rilru pe mang lo, ngaihtuahna tawi em em ringawt mai, incheina chhuak thar a piang awt bawk si, nu leh pa leh chungte lu tihai tak tak kan tam hi a paw lai ber mai chu a ni ta a ni. Thawmhaw an han thlan reng reng pawhin branded kher te emaw thenkhat chuan kan duh a, a nih loh leh showroom-a mi kher te kan duh a, kan neih tlin bakin kan che a, paw tak hi a ni ringawt mai. Nu leh pa tam tak chu an rum vawng vawng ngei angle. Modeling lama eizawng thei kan nih chuan thil tha tak a ni a; amaherawh chu, khawvel ram dangah chuan model tam tak chu intihcher an tum lutukna lamah an thih phah fo thin tih pawh kan hriat a ngai bawka ni. Cher, ria zeih zawih tan lo chuan Modeling lamah ei a zawn theih miah loh va, mi thau tan modeling lamah hmun a awm lo. Chuvang chuan model

tam tak chuan cher loh hlau reng rengin an nun an hmang a, ei leh in-ah an insum nasa lutuk a, an insum loh va, an thau chuan an eizawna a tawp mai dawn tih an hre bawk si nen. An rilru a hah a. Tam tak chu an awhawm lem loh hle. Mental disorder chi khat Anorexia Nervosa an vei a, an cher hle hnuah pawh la thau lutuk niin an inhre tlat a, an thih thlengin an insum tawh mai a ni. Heng thil te pawh hi kan hriat tel atan a tha hle mai. Kristian thalaite erawh chu Fashion Victim ni lo tura kan tan a ngai ta hle a nih tak hi. Heng thil fashion tih vel zawng zawngte hian chatuan ram min thlen dawn hauh lo. Pawn lam lan dan kan buaipui lutuk chuan chhungril lamah takna kan tlachham mai ang tih a hlauhawm hle a ni. Kan Pathian chuan pawn lam lan dan aiin thinlung lam a en zawk thin a, chu chu kan hriat reng a va pawimawh teh lul em. I Peter 3:3-4 ah Chiang takin kan hmu, *"In incheina chu pawn lam incheina – sam phiar te, rangkachak thi awrh te, silhfena inthuum te chu ni lovin, thinlunga mihring thuruk chu, rilru thuhnuai rawlh leh nunnem, silhfen chhe thei lova inthuum ni zawk rawh se, chu chu Pathian mithmuhiin a hlu em em a ni."* Thinlung thi anghlima Lalpa hming lamtu ni zawk turin inbuaitsaih ila, mahni tlin taw leh incheina uchuak lo hmang inchei ila, Pathian mithmuhiin chu chu a hlu em em a ni ♦

## **Tunlai khawvela KTP te mamawh Kristian Chhungkua**

— PC Laldinpuia  
Serchhip Hmarveng Branch

---

'KRISTIAN CHHUNGKUA' tih ringawt hi chu a hming aţang ringawt pawh hian KTP member-te zingah hian a mikhual lo hle mai, KTP member-te hi Kristian Chhungkaw chungchang hi han inzawt ta thut hlawm ila, a hrilhfiahna awlsam tak kan pek theih theuh a rinawm. 'Kristian Chhungkua' tih han lamrik ringawt hian rilru a lo lang chiang nghal leh bet tlat a awm a, chu chu Kohhran Hmeichhiate hi an ni. Anni hian Kristian Chhungkaw hmalakna beihpui hi an kovah an nghatin an ta neih chawt tawh a, thawh pawh an thawk nasa tawh. Thalaite hian Kristian Chhungkaw hmalakna zawng zawng hi Kohhran Hmeichhe kutah kan pa pek tawp mai a, kumpuan thupui leh bial inkhawmpui velah pawh thalaite zingah thupuia rawt pawh kan awm meuh lo niin a lang.

Kristian Chhungkua hi Kohhran Hmeichhe lam hian an ta hauh deuh tlat mai bawk a, thalaite thawhpuia han insawma ţan ho dan tur sawihona leh hmalak hona pawh awm lem lo hian anmahni hmeichhe huang aţang hian theihtawpin hma an la a, chhung inkhawm neih leh neih loh hi tehfung berah an hman ni deuh berin a lang a, kum tin ngawrh takin campaign an nei mup mup reng a ni. Kohhran Hmeichhe lam hian Kristian Chhungkua hi an buaipuina a lo rei tawh hle mai a, kum 1970 aţang khan Kristian Chhungkaw dinhmun tehna siamin ram puma hmalak ţan a ni a, tun thleng hian ngawrh takin hma an la chho mek zel bawk. He an hmalakna avang hian Kohhrante pawhin hma kan sawnin chhung inkhawm neih lamah pawh inchhiarna lam aţang chuan hma kan sawn hle tih a lang. Kohhran Hmeichhe lam record-a a lan danin Kristian Chhungkaw beihpui an thlak kum(1970)-ah Kohhran chhungkuaah ni tin chhung inkhawm nei 3.06% an awm lain kum 2009 report-ah chuan 46.61% an awm tawh a ni.

Kristian Chhungkua hi kan Synod lam pawh hian a ngai pawimawh khawp mai a, kum 1981-ah khan 'Kristian

Chhungkaw Kum' a lo puang hial tawh a, kum 2001 aṅang phei kha chuan kum tin Nilai leh Beihrual Thupui ah Kristian Chhungkaw pual bikin hun siam a ni ta ziah a ni.

Kristian Chhungkua hi eng nge ni? Eng nge a inngahna? Tu nge a ban pawimawha awm? Heng zawhna zawng zawng chhanna awlsam tē chu ṭhalaite, nakin lawka nupui pasal la innei mai turte hi kan ni. Chuvang chuan Kristian Chhungkua hi KṭP member-te hian nupui pasal kan inneih hma aṅanga din tura hma kan laka kan inbuatsaih a ṭul hle a ni. Amaherawhchu, KṭP te hian Kristian Chhungkaw lamah hian rilru kan pe taw lo hle niin ka hre ṭhin. Biak In hawnga nupui pasal inneih hi kan thupui khel taw ka la ni rih mai em aw tih theih a ni. Kristian Chhungkua hi ṭhalaite hian kan ngaihtuah chian a va ṭul em!

ṭhalaitena kan inchhiarnaa kan ngaih pawimawh ber leh member-te kan inzirtirna ber pawh Kohhran Dan Thianghlina nupui pasal inneih hi a ni a, he tehfung hmang dik te chuan chawimawi an hlawh a, a hnu lam erawh kan chhut zui pui peih vak tawh lo niin a lang. Kohhran Dan Thianghlina nupui pasal inneih hi a ṭha thlawt a, hemi ti thei tur hian

KṭP member-te pawh hi kan infuih thar reng a ṭul. Amaherawhchu, Kristian Chhungkaw din tura kan invil zui reng pawh hi a hun ta khawp mai, a chhan chu Kohhran Dan Thianghlina nupui pasal innei si, fate enkawl na kawnga hlawhchham leh Kristian Chhungkaw din lo hi tam tak an awm a, hei hi tunlai khawvela kan harsatna tawh mek, kan siam ṭhat hleih theih si loh a ni.

Kohhran Hmeichhiaten Kristian Chhungkaw beihpui an thlak ṭhin hi an tiṭhain an fakawm hle mai; mahse, Kristian Chhungkaw campaign-a zan lama hmeichhia zawk an vak chhuak dun dun hi chu an kuang lo an nawr deuh ni hian ka hre ṭhin. In lama mahni chhungkua awp luma fate kawng dika zirtirtu tur awm tak khan fate chhuahsanin mi dang fate kan vei a, Kristian Chhungkua din turin mi dangte kan nawr a, keimahni lam kan indah ṭha fo ṭhin. Nu tam zawk hi chuan hetiang a vak chhuak kher lo hian mahni pasal fanau teah rawngbawl na tur hi kan nei tam si a, mahni pasal fanau te siam ṭhat aia mi dang thisen zawmpui ni lote siam ṭhat lama kan phur zawk tlat ṭhinte hi a mak ka ti. Ni tin chung inkhawm neih leh neih loha



Kristian Chhungkaw hlawhtlinna kan tehfung hi chu a famkim lo deuhvin ka hria. Ni tin chhungkuaa Pathian biakna hun hman (Chhung Inkhawm) hi chu Kohhran mi leh ringtu kan nih chuan neih ngei ngei tur chi a ni a, Kristian Chhungkua tehfung ber erawh a ni lo. Chhung inkhawm bak deuh hi Kristian Chhungkua a chhiar theih tur chuan tehfung dang kan hman tel a tha hle mai.

Kristian Chhungkaw Campaign hna thawktu tur leh veitu tur ber nia lang chu thalaite hi kan ni. Thalaite hian Kohhran kutke ni tura kan rawngbawlina leh member hlate hnuh hnaih tuma kan beih mek naah hian Kristian Chhungkua hi i vei tel ve teh ang u. Kristian Chhungkua hi tunlai khawvela KṚP-tena kan mamawh a ni. Kan thatlai hun, nupui pasal kan la inneih hma ngei hian Kristian Chhungkaw din turin rilru siam ila, nupui pasal kan inneih hnua kan chhungkaw khawsak dan

tur rel fel ila, kan KṚP member puite hnenah hian Kristian Chhungkaw din pawimawh zia te hi zirtir ila, Kohhran Dan Thianghlima nupui pasal innei tura kan member-te kan fuih rual hian a dawt chiaha mi Kristian Chhungkaw dintir tur hian theihtawp i chhuah thar teh ang u. Kan rama harsatna tam tak kan tawh thin hi Kristian Chhungkua awm lohna atanga chhuak a ni tlangpui a, chuvang chuan KṚP-te hian Kohhran Hmeichhiaten theihtawp chhuaha hma an lo lakna Kristian Chhungkaw beihpui hi i thlak ve tak tak teh ang u. Kohhran Hmeichhe lam te nen yang hovin theihtawp chhuah ila, a hlawhtlinnaah tun ai hian hma kan sawn ngei ang. Kan ram a him lo, kan Kristianna a him lo, kan khawtlang nun a him lo kan ti. Kan ram, kan hnam leh kan Kristianna a boral hma ngei hian KRISTIAN CHHUNGKUA atangin i siam tha ang u ♦



#### ■ CHINA THUFING

- \* *Tuifinriat hi lawng lian sep kangtu a ni thei a, a lemtu a ni thei bawk.*
- \* *I hloh zat ni lovin, i chan zat chhiar thin rawh.*
- \* *Sipai hotu chak leh huaisen hnuaiah sipai chak lo leh dawihzep a awm theih ngai loh.*
- \* *In chhawng sang ber ber pawh hi lei atanga sak tan vek an ni.*
- \* *Tawngkam thianna chuan tlukna a thlen a, thu dik erawh chuan rinawmna a hlawh chhuak thung.*

## INBIHCHIAN NGAI K.T.P !!

— NI.J.C. Zothanmawii.  
Ramrikawn Branch

**K**ristian Ṭhalai Pawlten kan hla sak ṭhin lar tak pakhata ka chang duh em em lai chu, *'Miten min chhiar, min thlir reng e; ka awm dan zawng zawng min hai lo, Krista nun mawi leh Chanchin Ṭha keimahah hian hmuh an chak ṭhin'* tih lai hi a ni a. He hla chang hi KṬP member mai ni lo, Kohhrana rawngbawlna hrang hrang chelhtute tan pawh kan nun inbihchianna atana hla ṭha tak niin ka hria.

KṬP tih hming ringawt pawh hi hming mawi leh hming zahawm tak a ni a, ring lo mite awmna hmuna phei chuan ramhuai hnawh chhuah theihna khawp hiala hming hlu a ni. Kristian Ṭhalai Pawla ka inhman chuan Kristian nun dan tur renga mawi hian kan nungin kan khawsa ṭhin em tih te, miten engtin nge min ngaiha min hmuh(?) tih hi mahni ṭheuhah kan inenfiah reng tur a ni. Mahni fel leh ṭhaah kan inngaih ai chuan miten engtin nge min hmuh tih hi a

pawimawh ber fo zawk. KṬP member satliah nih ringawt chu sawi loh; Branch O.B. leh zaipawl member chin ngat pheite chu kan awmna hmun apiangah mi dangten mi naran leh mi satliah enin min en ngai lo va, kan khawsakna hmun apiangah kan nunah Lal Isua nun mawi leh ze ṭha hmuh an tum bik ṭhin. Chutih laiin kan nunah chêksawlhna a awm palh hlauh chuan keimahni avangin miten Pathian an hlat phah thei a, "KṬP-a inhmang takte pawh an chutiang, khatieng ve tho" an tih chuan mi dangte tibeidawngtu kan ni thei. KṬP-a kan inhman chhan Pathian tana mi ṭangkai tak kan nih theih loh pawhin, a hmeh hliahtu chu nih loh hram hram i tum ṭhin ang u.

Central KṬP a ni emaw, mahni awmna Branch KṬP-ah inhmang tak ni chung pawh hian eizawna hrang hrang kan dap a, kan thawh a ngai ṭhin. Sawrkar hnathawk te, sumdawna kawng hrang hrang buaipui te, zirlai nih te leh eizawna chi hrang hrang thawkte pawh kan ni thei e. Sawrkar hnathawk kan nih chuan Corruption leh zawmthawtna hrang hrang laka kan fihlim ngei ngei a ngai a, a hun taka Office thlen hman loh leh chhuanlam ho te te

siam office chhuahsan reng leh mi dangte aia ban hma chin fote hi kan tih tur a ni hauh lo. Sumdawng mi kan nih pawhin a buk tling lo leh tehna dik lo hmanga thil kan zawrh te, a expired tawh tih hre reng chung a damdawi leh ei leh in theih thil hrang hrang zawrh te, a lakna 'rate' to chuang si lo, man to uchuak lutuka thil zawrh te leh kan thil zawrh pawlh dal theih chi pawlh dalte hi kan Pathian duh loh zawng tak a ni tih i hre reng ang u.

Nu leh pa tam tak chuan an fate zirlai ni chung a KṚP-a inhman hi an phal lo ṭhin a, hei hi ngaih dan dik lo a ni. A taima leh tum tak tak tan chuan inkhawm ṭhulh chuang lo leh KṚP hla zir ṭhulh chuang si lo hian lehkha zirna hun a tam lutuk. Zirlai, KṚP-a inhman chhuanlam avanga result chhe tak nei ṭhinte hi KṚP-ah pawh inhmag lo se result ṭha an neih phah chuang lo vang. Hetih lai hian zirlai KṚP member chu KṚP-a inhmag ve lote aiin a zir taima zawk ngei tur a ni a, result ṭha tak mi dangte tana entawn tlak ni ngei turin a nei ngei tur a ni bawk. Kan Pathian chuan thatchhiat leh dawngdah a phal lo va, exam-naa entawn chinte hi corruption bul inṭanna a ni tih hriain hmelma setana lawm zawng tak a ni.

Hun eng emaw chen aṭang khan KṚP member zingah incheina uar uchuak tak tak kan pung chho ṭan a, thil pawl tak a ni. Mahni in chhung khur dinhmun leh thawh chhuah phu lova incheina man to tak tak kan inbel ṭhinte hi kan inen fiah a ngai takzet a, a bikin hmeichhiate hi kan ni. Hausa leh khawsa thei zawkte thuam inbel ang hi a nei lo zawkte pawhin inbel kan tum ve ta zel a, chhungkaw tlakranna a ni tih i hria ang u. Mihringte kan lan mawina hi kan incheinaah ni lovin, kan nungchang leh ziaah a lang chiang zawk. Rawngbawlnaah hian Kohhran leh mihring mit hmuha lan mawi kan tum ṭhin a, a rawng kan bawl chhan Lal Isua hian mawi min ti em(?) tih hi i ngaihtuah fo ang u.

Zaipawl member lar leh KṚP-a hman tlak tak ni chung a Dan khatnaa inneih kan tlin lo fo te hi thil inhmeih lo satliah mai ni lovin thil zahthlak ber a ni. Tunah pawh hian Mizo Kristiante hun pui ber Krismas a lo hnai leh ta a, Lal Isua chuan a nihna dik taka a piancham (Pianchamphaphak a ni lo, tunlaiah ṭawng dik zawkah ngaiin kan hmang fo) hi lawm turin min duh a ni. Krismas leh Kum thar vuakvetah hian KṚP member-te tan chhuah vahna

hun a tam a, urlawk zan leh kum hlui thlah zan tlaivar te, hla zir leh carol service te kan nei thin a, heta tanga hmeichhiat mipatna hmang khaw lo leh sawn pai ta nawlh nawlhthe leh zu leh rui theih thil dang tih phah ta mai te kan awm fo thin a, mahni theuh thianghlim leh hlim taka hmang turin i inpuahchah lawk ang u.

KTP-a inhmang tak chung hian Bible chhiar thlahthlam hi a awl khawp mai, Bible chhiar peih miah si lo, magazine duk dak lo tak tak chhiar peih leh viau si te; Bible chhiar aia T.V. en hrat tak, film chhuak leh tur hming hre tak te, Bible chhiar aia Facebook-ah thu ho tak tak zan rei tak tak thleng buaipui peih viaute hi kan lo ni ve palh ang e. Bible chhiar hi kan thlahthlam tur a ni lo va, Pathian thawk khum Bible hi min tichaktu atan ringtu nunah a pawimawh em em a, kan hun awl neih zawng zawngah

Bible hi i chhiar thin ang u. Van kawng min kawhhuuhtu Bible ngainat hi inzirtir uar zel bawk ila.

KTP kan nih chuan kan YMA em em bawk tur a ni, khawtlangah chhiatna hrang hrang a awm chang pawhin a thleng hmasa ber leh a thothing tha berah kan tanga ziah tur a ni a. KTP leh YMA hi lak hran theih a ni lo va, a kal kawp tlat bawk tur a ni. Tam tak chuan kan hre lo mai thei a, YMA hi kan Missionary hmasa Pi Zaii chenna In (tuna Synod Modertor's Bangla)-a din kha a ni nghe nghe. KTP member ni si, nula tlangval mitthi lumennaah pawh kal ve ngai loh te, thlan laihnaa kal ve ngai reng reng lohte hi thil inhmeh lo tak a ni. KTP nun chu rinawmna leh dikna, taimakna leh thawhrinna, tumruhna leh beidawng lova beihna, mi dangte tana a tangkai thei ang bera hun hman hi a ni♦



■ *Mahni chauh pawhin ka kal thei em tih aain, mi dang zui theih ka ni em tih hi kan infiahna tur dik tak zawk a ni.*

— Hubert Humphrey

■ *Mi a i inhnialpui chuan nang pawh i a ve tihna a ni.*

— Doris M. Smith

■ *Eng kawngin nge hlimna i zawn tih ka hre lo; mahse, thil pakhat erawh ka hria: mi dang rawngbawlsak dan zawnga, chumi tihlawhtling nasa apiang chuan hlimna an pumbilh ang tih hi.* — Albert Schweitzer



***Tv.Laltholeha, (1985 - 2012)***

*Tv. T.C. Laltholeha* hi Upa Renghmingthanga leh Pi Lalrokimi te fa 6 zinga a pangana niin 7<sup>th</sup> April, 1985 khan Rengdil khuaah a lo piang a. Unau mipa pali(4) leh Hmeichhia pakhat(1) neein, an unau zinga naupang ber dawttu a ni.

Rawngbawltu chhungkua a tanga lo seilian chhovin a naupan lai leh tleirawl thleng pawha Pathian tih mi, mi inngaitlawm leh mi pawisawi hlau tak a ni a. 'Tleirawol sual' kan tih pawh nei lovin, Kohhran leh KTP bel chawt mi a ni a. Kum 2005 atangin naupang te ni chungin Rengdil Hmuntha Branch KTP-ah OB-a ni tan a. Fin. Secretary, Asst. Secretary leh Secretary hna te a lo chelh tawh a. Secretary hna hi term 3-na a chelh mek lai a ni. 5th January, 2012 khan Rengdil Pastor Bial a lo ding a, Rengdil Pastor Bial KTP Asst. Secretary-a thlan niin, Rengdil Pastor Bial Zaipawl Asst. Conductor atana ruat a ni bawok. Amah hi rawngbawolnaah a theih ang tawka inpe mi, thawhpui nuam leh nelawm tak a ni a, Kawrthah Pastor Biala Rengdil Hmuntha KTP a awm lai pawhin Bial Committee member leh Bial Zaipawl member niin,

sulsutu pawimawh tak a ni. Amah hi zai leh rimawo ngaina mi a ni a, Kohhranah Zaipawl Conductor, Hla hruiatu leh keyboardist ni bawok a ni a. Sunday School lamah pawh Intermediate Deptt. Leader ni lai a ni bawok. Khawtlang leh ram tana mi tangkai tak a ni a, Taitesena Group YMA-ah Executive Committee member ni lai niin, Rengdil North Branch YMA-ah Secretary-a ni a, Rengdil Games & Sports Association-ah Fin. Secretary chelh lai a ni bawok. Ruihhlo do kawngah pawh theih tawpa hma lain, JAC-ah Secretary ni lai a ni.

July, 2012 vel atang khan a ke leh a mit a sawisel tan a, theih ang anga inenkawlin, 14<sup>th</sup> Aug. 2012 (Tue) khan thawk harsa a tih awangin Kawrthah CHC-ah a inentir a. Damdawi te Doctor-in an lo chawh a. 16<sup>th</sup> Aug. 2012(Thu) khan a natna hi zual deuhwin Kawrthah CHC-ah inentirin a kal leh a, Doctor-in kal tha lo leh pumpui ulcer a nih thu an lo hrillh a. Damdawi inah admit-in theihtawp chhuahin an enkawol a; mahse, a natna hi a lo nasat tawh awangin Doctor-te thiamna leh thahnemngaihna chuan awmzia a nei thei ta lo va, 17<sup>th</sup> Aug. 2012(Fri) 1:10am khan a rawng a bawol thin Lalpa hnenah min chawolhsan ta a ni.

A ruang hi an chenna inah tlaiwarpui niin 17<sup>th</sup> Aug. 2012 (12:00Noon) khan Pastor E. Ramchullova i/c Rengdil Pastor-in vuin, Bial Zaipawl leh Rengdil Hmuntha Kohhran Zaipawolten amah thlahna hla an sa a. A hla duh ber, 'Ka taksa lungngai mah sela,' tih hla sain ui tak chungin kan thlah liam ta a ni ♦

## Hruaitu CHANCHIN

**Dr. Lalliansanga**  
*Committee Member, Central KTP*

**A**pa len em vang pawh ni hran lo, mitena 'U ena an en' vang zawka 'U Lian' tia koh thin, mi thenkhatin 'Liansang' tia an koh baw, Pu Lalliansanga hi ni 21, August, 1976 khan Pu Lalbiakzuala leh Pi Lianzovi te karah, Presbyterian Hospital, Durtlang-ah a piang a. A naupan lai atanga naupang fel leh nu leh pate thuawih thei tak a ni.

A lan dana pa sa tha leh nghet a nih piah lamah, mi rilru nghet tak a ni. A san zawng feet 5 leh inches 4 a ni a. A rih lam kg 72 a ni. Vawi khat hmel hmuha ngainatawm nghal hmel a pu a. Nuih uarh uarh lam aiin nuih sen sen hia tih dana ni mah mah zawk. Pa kawm nuam leh mi dangte tan inpek hreh lem lo tak, a hmel en aia harhvang tak a ni.

Kum 2010, April ni 29-ah a rilrem zawng tak nula, Pu C.Thangzama leh Pi F. Thanmawii(L) te fanu C.Lalengkimi nen an innei a. Pathian malsawmna fanau pakhat, Joel Zobiakvela (kum 1 leh thla 4) an nei.

An veng Durtlang-ah zirna bul tanin Middle School thlengin a kal a. Chumi hnuah St. Pauls High School-ah kalin, he School atang hian HSLC a zo a. Thiamna Rûn sang zawk chhonzawm zelin, St. Edmunds, Shillong-ah PU (Science) leh B.Sc. a zir zo leh a. Kum 1999-ah NEHU atanga M.Sc. a zir zawh leh hnuin, Doctorate Degree neih a rilruk leh a. Kum 2009-ah Ph.D. chu a zo leh a ni. Zirna lam avang hian a hun tam tak chu Shillong lamah a hman a, Shillong-ah lehkha a zir chhung zawng zawng pawhin mite tana atangkai leh chhenfakawm nih tum tlat mi a ni.

Shillong-ah a awm laiin rawngbawlina lam a tuipui a, Sunday School lamah Senior Deptt. Leader te, Intermediate Deptt. Leader-ah te ruat a ni a, tunah hian Durtlang Kohhran-ah Beginner Deptt. Leader a ni mek a ni. Zai lam pawh a ti thei. Shillong-ah leh Durtlang Kohhran-ah Khuangpu-a a tan thin bakah Zaipawl Conductor te a lo ni tawh thin a ni a, Social Front Committee lam te hi a tui zawng tak a ni.

KTP rawngbawlina lamah chuan tunah hian an Branch-ah Asst. Secy. chanvo a chelh mek a. Branch Leader leh Secretary chanvo hneh taka lo chelh thin tawhin, Bial Secretary-a lo ni tawh thin baw a. Tunah hian NEICCYA-ah Secretary chanvo

a chelh mek. Kohhran leh KTP lama tul taka rawng a bawl chung hian khawtlang tana rawngbawlna lamah a bang chuang lo va; YMA-ah committee member ni chungin, Section lamah Secretary hna a chelh thei bawk a ni. Mi indaihzaizai tak a ni tih a hriat theih mai awm e.

A hobby in zawh chuan 'Thlalak' a ti ngei ang. Thlalak hi nuam a tiin, khawi ilo kal nikhua pawhin a lek lurh lurh thin. (Central KTP Committee member-te hian thlalak an tui ngang mai. Thing zara sava fu te hi an hmet ngawt zel. Thenkhat tan chuan a hlu.- *Ed.*) Sports a tih theih lam chu hriat a ni law, a en lamah chuan football a tuiptui.

Hun hlimawm a tawn nual avangin 'ber' ti zawnga han

sawi tur a hrethiam chiah lo va; chutih rualin, a nupui neih ni leh a fapa pian ni chu a hun tawna a hlim zual ni a ni. Pu Liana hi mi rilru tuang, huat pawh nei tehchiam lo a ni a; mahse, mi intivei a ngaina lo. 'Isu, I thu ka ngaihtuahin' (KHB 54) hi a hla duhte zinga a duh zual a ni a, Bible thu "Pathianin khawvel a hmangaih em em a, chutichuan a Fapa mal neih chhun a pe a, amah chu tu pawh a ring apiang an boral loh va, chatuana nunna an neih zawk nan", (Joh. 3:16) hi a duh em em.

Chaw eia sawm duh chuan artui kan leh saum bawl lo siamsak a fuh khawp ang. Chingit erawh chu a ngainat loh zawng tak a ni. Biak duhna i neih chuan 9612241873-ah i be dawn nia ♦



### SYNOD CHOIR RAWNGBAWLNA :

1. **Sialhawk-ah** : Sialhawk Bial KTP Silver Jubilee, September 22&23, 2012-a Sialhawk Kohhrana an lawm chu an hmanpui a, tum ruk dinah hla 8 an rem a ni. Mi pali solo-in an zai bawk.
2. **Ramhlun North Kohhranah** : September 30, 2012 (Pathianni) zana Ramhlun North Kohhran inkhawm an hmanpui a, tum thum dinah hla 6 an rem a ni. Director-in rawngbawlna reports a pe bawk.
3. **Ramhlun East Branch-ah** : October 1, 2012 (Thawhtan) zana Ramhlun East Branch inkhawm an hmanpui a, tum thum dinah hla 8 an rem a, pakhat solo-in a zai bawk. Tv. John Lalremruatan thuchah tawi a sawi a ni.
4. **Mission Veng Kohhranah** : October 7, 2012 (Pathianni) zana Rev. Thangzauva, Synod Moderator kohhran tlawh tawiaawmin Mission Veng Kohhranah an inkhawm a, tum hnih dinah hla 2 an rem a ni.



## HRINGLANG TLÁNG

### *Krismas-a ka duhthusam*

*Krismas thlen nan chawlhkar tam a awm tawh lo. Amaherawohchu Krismas hla ka ngaihla tui lo va, kan in cheimawi ka phur lo va; Krismas huna ei tur chhang ur turin ka tha lah a tho hek lo. A dik chauh pheh chuan Krismas lo thleng tur chu ka huphurh lawok em em zawk a ni.*

*Thla 2 kalta khan Doctor-in ka pa chu thla 12 emaw chauh a dam tawh tur thu min hrilh a. Doctor hrilhlawokna chu a dik a nih ngai chuan kumin Krismas lo thleng tur chu ka pa hova Krismas kan hman hnuhnung ber tur a ni dawn tihna a ni. Chuti a nih chuan chumi kum Krismas chu hlim tak leh duhthawh taka hman tur kan nih chu ka hrechiang khawp mai; mahse, Krismas lo thleng tur huphurhna chuan ka thlarau a hmet chau tak meuh tlat si a ni. Ka pa chu damdawí inah awmin, uluk bik taka enkawol ngai a ni tlat a ni.*

*Ka pasal, Roy-a hnenah chuan, "Krismas-ah ka pa chu Krismas min hmanpui turin in lamah phur hawng ıla a that ka ring," ka ti a, ani pawh chuan kei leh ka pa dinhmun chu min hriat thiampui khawp mai. Kan in lama ka pa enkawolna tura senso ngai zat chu kan han chhut dun a. Damdawí in khum man chawíin kan hman a ngai phawt ang. Tin, ka pa chu car-ah a chuan theih loh avangin damdawí in ta, ambulance man chawíin kan hman leh a ngai bawok ang a; amah viltu tur nurse kan rawíh a ngai bawok ang.*

*Pawisa ngai tur zat kan han chhut a, kan sum dinhmun chuan ka pa enkawolna senso ngai zat tur charve pawh a khuh phak dawn loh avangin Krismas hunah pawh ka pa chu kan hawpui thei dawn ta lo a ni.*

*Tuk khat chu damdawí ina ka pa tlawh tur chuan ka chhuak leh a, ka car chu darkar khatah mel 60 chuanga chakin ka khalh par par a; chutih lai chuan radio-a thupuan hi ka hre ta a. Radio station hotute'n mi hrang hrang hnen a'angin Krismas-ah thleng ngei se an duhthusam 12 an hre duh a lo ni a.*

*'Duhthusam chu kan nei ngei maw le,' tiin ka car chhungah chuan ka hriat tawh lekin ka phun sep sep a. Kan nupain ka pa chungah tih kan duh leh kan sum dinhmunin a zir loh avanga kan duhthusam kan tih theih loh dante chu ka rilruah a rawn lang thar leh a.*

*Chutih lai chuan Luka 1:37 thu, 'Pathian thu chhuak reng reng thil tithei lovin a awm lo vang,' tih kha ka rilruah a rawn lut zawk a. Damdawí in ka thlen*



*hma kawng tluan chuan ka rilruin, 'Lalpa, khawngaih takin Krismas hunah ka pa kan hawpui theih nan min fanpui rawh,' tiin ka fawngtai mawlh mawlh a.*

*Chumi zana in ka thlen hnu chuan radio station hotute hnena thawon tur lehkhka ka ziaak ta a. Ka lehkhkaah chuan ka pa natna leh a dinhmun te, a hova hlim taka Krismas kan hman fhin thu te, kumin Krismas chu a Krismas hman hnuhmung ber a nih kan rin thu leh chumi avanga a hova Krismas kan hman theih nan damdawi in atanga lak chhuah kan duh thu leh kan sum leh pai dinhmunte chu tlang takin ka ziaak vek a. Chu chu kumin Krismas-ah lo thleng ngei se ka duhthusam a nih thuin ka thuziak chu a tlang ka kawm a. A tukah chuan ka lehkhka ziaak chu ka fawngtai hnan a, dak inah ka thlak ta a.*

*Ni eng emaw zat a liam hnu chuan radio station atangin telephone ka dawng ta a, an thupuangtu chuan, "I duhthusam kha ataka thlentir ngei kan tum e," tiin min rawn hrilh a.*

*Damdawi in atangin ka pa kan hruai hawng thei dawn a ni! Chu thu lawmawm ka hriat chuan ka lawm lutuk chu tuibur hmuamda zeta rei chu ka hamhaih chhe zo vek mai. Damdawi ina hman chi bungraw siamtu company-ten khum min siamsak ang a; lirthei siamtu company-in ka pa phurh hawna tur ambulance an thawh dawn bakah amah enkawltu tur nurse pawh ngaihtuahin, min rawihsak dawn bawok a ni. Ruahmanna an siam fel nghal vek a, Krismas urlawok niah awlsam tein an thawok tawh mai dawn a ni.*

*Pathianin ka pa chungah thil mak a thlentir zel a, ka pa chu damdawi in atanga hruai hawon theih turin a nunna a zuah ta zel a ni.*

*Krismas urlawok ni zingah chuan damdawi inah ka va kal a, ambulance pawh a lo ding vang tawh a. Ka rilru chu a hlim em em a, hlim takin Krismas hla ka sa rat rat a. Ka duhthusam chu tihhlawhtlin a ni dawn tlat a ni. Ka nu pawh kan in cheiin in lamah a buai em em bawok a; buai hle mah se hah a hre lo.*


*Damdawi in ka thlen hnu rei lo teah chuan damdawi ina thawok mi thiam bikte chuan a dan tur dik takin ka pa chu stretcher-ah hlangin ambulance-ah an nawr lut a, ambulance chu kan in lam panin a tlan nghal a. Ka pain a in a hmuh leh meuh chuan a lawm lutuk chu a lung a chhia a, a mittui a luang zawih zawih a. Ka pa chang a ni lo, kan zavai chuan mittui tla lo tu mah kan awm reng reng lo.*

*Khami kum Krismas urlawok naa thil thleng kha ka theihnghilh theih tawhin ka inring lo. Ka pa hmela lawmna te, min hmangaihtu mi chi hrang hrang hmelte kha ka mitthlaah Chiang takin a cham reng mai. Radio station hotute inpekna avangin khami kum Khan hlim takin ka pa hovin Krismas kan hmang thei a ni si a.*

— Nancy B. Gibbs

(Source : Alabasta)

## CHATUAN NUNNA ROHLU KA CHHAR TA

 una kan Kristian hlabu hman mek a No. 411 na, 'Chatuan Nunna rohlu ka chhar ta' tih hi Mizo Kristiante zingah chuan hla langsar leh mi te thinlung hneh ber pawla ni awm e.

He hla phuahtu hi Baptist kohhran hruaitu hlun leh Baptist kohhran tana pa chan chang thin a ni a. He hla hi Mizoram buai lai kum 1966 a, Cherra-a Pathian thu an zir laia a phuah a ni. Chutih hunlai chuan, mihring nunna hlut loh vanglai tak a ni a, mahni hnampui ngeite pawh thu ho te teah nunna inlaksak hun lai a ni. Inhek te, inrinhleha te leh inhuatna naran mai mai vanga inthah a hluar hle thin a.

Ama hnam pui, a pian leh seilenna hmuna thil thlang leh an tawrhate chuan Rev. Hrangena thinlung chu a khawih na em em thin a. Mizo Kristiante chu khawvel hneh tura koh kan ni a, khawvel chu Krista tana siam tura koh kan ni. Tharum hmang chuan khawvel hi a hneh tak tak theih loh a. Silai leh

mihring ban tha chakna hmang chuan khawvel hi kan la tak tak thei ngai dawn lo a ni.

Chutiang hun harsaah chuan Rev. Hrangena chuan hnehna tha leh dik, khawvel hnehna thutak hi a lo phuah chhuak a. 'Thenkhatten tawlailirte ringin, Ralthuam fankim ring mah sela, Kei erawh chuan Lalpa hming ka ring a, Nungin ka tho, hnehtu Lal zarah' a lo ti chhuak ta a ni. Kan hla bua chuang lo, 'AWHmangaihna a va thuk em' tihte, 'Boralte zawng turin' tihte pawh a phuah a ni.

10.10.1942 khan a piang a, 12.8.1990 khan motor accident vangin sual thihna ral lian a lo ngam phah ta a. A hming leh a hnathawhte a lo rin thin Lal Isua hnenah a chawl ta a ni.

Mizo Kristian hla phuahtu zinga langsar pawl tak Dr. Ramdinthara Sailo hian ringtu nunkawng a zawh theihna te, hla heti zozai a phuah theihna te chu Rev. Hrangena leh a 'Chatuan nunna rohlu ka chhar ta' vang niin a sawi thin. He hla hi kan zavai hla a ni; chatuan nunna rohlu chhar tawh zawng zawng tan. Ni e, keini chuan he hla hi kan sa thei a ni: 'Rorelna lo thlang tur ka hlau lo'ng Thiamchan lawkna ka neih vangin, Tu nge ka lal hmaah min hek ang? Ka ta a ni, a ta ka ni si'

## ANTIBIOTICS - Hre Chiang Rawh

— -Chris M.S. Dawngkima

Dawrpui School of Science & Technology

**R**an taksa cell-te hi indo thei tura thuam chak vek an ni a. He 'Immune System' hian pawn lam aṅanga min rawn beitu, natna hrik lakah min veng tlat a; chuti chung chuan natna hrik tam tak chuan chung taksa sipaite chu rawn pal tlangin kan thihpui tur natna min la veitir thei tho bawk! Chutiang natna laka kan invenna tur leh, kan taksa ral dotute pui turin damdawi kan ei a lo ngai ta a ni.

Mihring tibuai tu natna hrikte hi chi li-ah a ṅhen hran theih a - Virus, Bacteria, Protozoa leh Fungus te an ni. 'Damdawi' hnathawh chu mihring taksa tana paw khawih si lova hetiang natna hrikte zuk tihlum hi a ni a. Damdawi hi natna hrik tan tûr chi khat a nih avangin kan taksa pawhin damdawi hnathawh chu a lo tuar ve ṅhin a, chu chu 'side effect' tiin an sawi ṅhin. ANTIBIOTICS hi chutiang damdawi, 'Bacteria' leh 'Fungal infection' te enkawl na chu a ni a. Bacteria a that thei a, an inthlahpung tur an veng thei bawk. Chutih laiin Virus avanga natna (hritlang satliah,

sentut, tangseh, AIDS, etc.) enkawl nan a hman tlak hauh loh thung. Chuvangin kan taksa tinatu chu eng natna hrik ber nge tih hre chiang hmasa phawt loa damdawi kan ei chuan, kan taksaah tur hlauhawm tak kan chhekkhaw tihna a lo ni thei ang.

**ANTIBIOTICS - Engtia Ei Tur Nge?** 'Bacterial infection' avanga natna- hrawk na (strep throat), bengkerh, hliam pun leh pan te avanga antibiotics kan ei hian thawklehkhatah a reh duak ṅhin a. Chutiang hunah chuan kan lo dam tak avangin kan damdawi ei lai chu thlah mai a awl hle a. Chu chuan kan taksaah paw nasa tak hetiangin a khawih ṅhin -

- (a) I damdawi ei khan i taksa bacteria hrik la chambangte kha a that chimit hman ṅhin lo.
- (b) Damdawiin a hneh loh bacteria la damte kha insiam danglamin, damdawi hnathawh tichhe thei tur thil an lo siam ve thuai a, chutiang ho chu 'Resistent bacteria' an ti ṅhin. Kha damdawi kha i hman/ei nawn leh hunah a hma angin hna a thawk thei tawh ṅhin lo.

Doctor-ina damdawi min chawh ni lo, mahni thua lo ei ve ngawt hi Mizoten kan sim a hun tawh hle mai. ṅhiantie ngeih ang lo dampui tum ve ringawt pawh hi thil atthlak tak a ni. Damdawi kan ei reng rengin a 'dose' min

chawh ang hi kan ngai pawimawh em em tur a ni a. Antibiotics hi kan natna vei a zirin ni thum aṅanga thla khat ei thlengin a awm a; hun bi neia ei tur niin, darkar 4, darkar 6, darkar 8 emaw darkar 12 dana ei turte an ni bawk.

Zir mite chuan damdawi eitu, mi 80% te hian damdawi ei hun bi theihngihl chang an nei ṅhin niin an chhut a. Chuvangin hetiang damdawi ei theihngihl chang a lo awm hian engti anga ei zawm tur nge tih hi hriat a pawimawh hle. I antibiotic ei tur vawi khat i lo hmaih palh a nih chuan, i ei leh hunah i lo hmaih tawh aiah tiin a let ei mai tur a ni hauh lo a. I hmaih palh a ni tih i hre chhuak thuai a nih chuan, i hriat chhuah rualin ei leh mai ang che. Hre chhuak harin, a dawttu ei a lo hun leh tawh a nih erawh chuan, i lo ei hmaih chu ei tawh lovin paih daih mai rawh. I taksain a ngeih tawk aia tam antibiotics i thisenah a awm a nih chuan natna dangin i taksa a tibuai thei a, i lo chauh phah hial thei a ni.

### RESISTANCE

Bacteria hrikte hi sik leh sa lo danglam ang zelin an inthlak danglam ve ṅhin a. Enkawl an harin, 'ar pul hri vei dam leh, hri vei thei tawh lo' ang maiin damdawi hnathawh do let dan zirin an thiam zung zung mai ṅhin. Entir nan, 'Penicillin' hi antibi-otic ṅha tak a ni a; bacteria hrik

vanga natna enkawl nan an hmang ṅhin. Kum 50 kal taah khan Staphylococcus aureus (vun natna thlentu) chu 'penicillin' hmanga enkawl dam theih a ni a. Hun a lo liam a, he vun natna hrik hian penicillin chu do letin, enzyme chi khat 'penicillin tichhe thei' a siam thiam ta tlat mai a. Dam lo chuan penicillin chu han hmang leh bawk ṅhin mah se, a hma angin hna a thawk thei lova, natna hrikte chu a tihlum thei ta lo a ni. Chutiang natna hrik, damdawi pangngaiin a tihlum mai theih tawh lohte chu Resistance nei tiin an sawi ṅhin a. Doctor-in antibiotic ei tur a bituk zat ei kim lova kan ngaihtah hian 'resistant bacteria' kan taksaah kan siam thei dawn tihna a lo ni.

### SIDE EFFECTS

Kan antibiotics eia zirin 'side effect' chi hrang hrang kan taksaah a lo lang thei a. Khawsik ser ser, luhai, luak chhuak leh allergy- te a thlen thei. Side effect langsar tak pakhat chu kawṅhalo hi a ni a. Hetiang kawṅhalo a lo awm theihna chhan hi kan ril (intestine) vela kan taksa mamawh siam chhuaktu bacteria ṅangkaite kha kan damdawi eiin a tihlum tel ve avang leh, pawn lam aṅangin natna thlen thei bacteria - Clostridium difficile-in bu arawn khuar zui vang a ni fo ṅhin. Antibiotics hian hmeichhe zingah 'fungal infection' (Candida) avanga serh natna a siam thei bawk♦



# Hriatzauna

—Rochungnunga,  
College Veng, Aizawl

## Just Do It

### Bul ãanna

Khawvel sumdawwna tualzawla Reebok, Adidas, Siemens, Kappa Ltd. te paih thlaa, Varparh Arsi ang hial lalthutphah chawi sang a, khawvel ngamtu Nike-in khawvel a ngamna hmanrua hi a va ho tehlul ve aw! Greek pathiannu, Greek pathiante zinga lar ber pawl pawl ni chiah lo hming kha ãhang khat lian chungin khawvelin a hming a hria a, 'hming zawng zawnga hming chungnung ber' tih hial tlak khawpin a rawn invawrh sang thei a ni. Hetiang taka khawvel sumdawwna fawng chelh thei tura Nike chawisangtu chu an slogan 'Just Do It' hi a ni a, he thu tawi tẽ hmangin 'khumtir rawh u' tih kher ngai lovin hlawhtlinna lal lukhum kan khumtir lo thei lo ang.

A ão bul chhui chhuaka hrihfhiah thiam kher lo tur, thingtlang putar aãanga khawpui tlangval thlengin 'Just Do It' avangin Nike pheikhawk kan rap sawi beih buih a. Ori a ni emaw, dubli a ni emaw, kan ngaihtuah lo. He slogan tawi tẽ avang hian Nike chuan kan feh kawng thleng thleng min ùm a, kan mut pindanah min riahpuitu a lo ni ta.

### Nike vs. Reebok

Nike company leh Reebok sumdãwnna kawnga an inelzia hi kan hre pha lo vang a, a zawng a za ziah sên pawh a ni chiah lo. Reebok hian chungnun ãhelh ãhelh chãng an nei a, chutia hmasãwn zãwk leh lian zãwkanga an lan chhoh mẽk lai chuan 'Just Do It' hmang hian Nike hian ram a rawn la chho a, tẽ zãwk dinhmun aãang chuan lian zãwk awm lovin, a chãng chuan Nike hi a lian zãwk ãwm mang nge tih turin hma a rawn sãwn a, a hnuah phei chuan Reebok hming a lân ta hle a ni.

Company slogan mai mai a lâwm kan ti mai thei, mahse slogan mai mai a ni lo. International market-a Nike tih mingthangtu leh mite rilrua Nike awmtirtu a ni. 'i am what i am' hmangin Reebok-in ram lâk tum ve viau mah se 'Just Do It' ang êm chuan a ropui thei tlat lo. Advertising history-a slogan lar ber leh miten an hriat lar ber hi 1988 kuma puah chhuah kha a ni. Hemi kum hian Nike ad agency-a an hotu pahnih - Dan Weidan, Kennedy leh Nike hnathawktute inhmukhãwm chuan 'Just Do It' ãawngkam hi an rawn chher chhuak a. He inhmukhkhawmah hian Dan Weidan-a thusawi, "Nangni Nike

mite u, ti mai rawh u" a tih aţangin 'Just Do It' hi an chher chhuak ta a ni.

### **Slogan hmangan hnehna**

1980 chho vela Reebok chungnung zâwka miten an ngaih chu 'Just Do It' hmangan hian Nike chuan a lehthal tial tial a, 1990 chho vel kha chuan tu company dang mah tluk phâk lohvin Nike chuan hma arawn sâwn a, he thu tawitê hmangan hian branded thuamnaw ngaihsâna mipuiaha arawn siama, advertisement-in thil a tih theih zia sumdâwngten an hriat phah a. 'Just Do It' chu infiamna leh inkhelhna thuamnawa awm tur rênga mawi a ni tawh a, sports dress ni si Just Do It inziak lohna chu branded lo riaua hriatna a siama ta hial a ni. He slogan tawitê avang hian Nike chuan sport shoe-a sumdâwnnaah an share 18% aţangin 43% laiina sânpah a; kum 1988-1998 chung khan sports-shoe hrallhna aţanga an sum hmuh chu \$td9.2 zet a tling a (a hma kum 10 chungin \$mtd877).

Just Do It campaign Nike chuan an nei chho tak tak a. Advertisement atan hian \$mtd300 zet an sêng a, mahse chu chuan an thil siama chhuahah nasa takin kori a tu a. US-ah ringawt sneaker hrallh zawng zawng zinga zaa 80 khu Nike kut chhuak a ni. Just Do It ţawngkam hi miin an lâwm a, a bikin ţhalai, kum 18-40 inkar zingah a lar zual a. Sneaker-te sports-shoe nia an hriatna thin a tibo va, fashion pangngai angin

Nike hian Just Do It campaign hmangan an chhuah a, a hnuah jogging leh fitness lamte pawh an tuam chho ta zel a ni.

### **Just Do It khawvel**

He slogan hian Nike kut chhuak a hawi lêm lo va, mahse miin a hâk leh a inbel zâwk kha a kâwk a. Nike kut chhuak i inbel duh a nih chuan inbel mai rawh tihna tluk a ni. Hei hian mi rilru a hneh ang reng hle a. 'Ka lei a nia, ka duh duh ka ha ang chu' ti thinte rilru Nike ad agency hian a hre hle a ni.

Just Do It slogan tichhuaktu Nike hian sum a ngah a, advertisement-ah pawisa tam tak a dah a, a sêngbawka. He au hla hian mi tam tak rilru a luah a, tunlai khawvêl, nun zalên leh inkhuahkhirhna tlachham takah hian mahni duh duh dâna nun duhna a lian a. Duh ang tâwka awm theih loh avanga zalên lo riaua nia inhriatna a awm a. Hetiang khawvela mite hian 'Just Do It' hi an lâwm a ni. Tunlai ţhalai tam takte hian 'Just Do It' hi an thupui a ni ţan mêka. Nike slogan a nih leh nih loh lam an ngaihtuah lo va, sport shoe leh dress nen a inkaihlnawih dan hriat si se pawh ţul an ti hran lo; an duh leh châk chu an duh leh châk apiang tih theih a ni.

Khawtlang inkhuahkhirhna ninawm tihna an nei a, kohhran leh chungkaw invawnnaten an thupui ber tihlawhtling tura ke penna a dâl a. Just Do It tih sawi mai lo va, a taka tihlawhtlin an

duh a. Heng zawng zawng tihlawhtling thei tura dâltu awmte an nin avangin zalên lo niin an inhria a. Sual a zalên miao loh avangin sual ti duh tan chuan zalênna a awm lo ðhin. Invawnaa ûp leh, inkaihhraina puithu ruih mai an kham a, an duh chu zalên, holam taka awm theihna leh an duh zâwng leh thlakhleleh zawng tihpuitlin theihna a ni.

### Eng brand nge?

Made in Vietnam a ni emaw, Made in Bangladesh a ni emaw, Nike lem a chuan tawh chuan ðha turah kan ngai ve ngawt tawh a. Dubli rau rauah 'Adibas' te ai chuan Nike lem chuan ngaihsan a hlawh tho tho. Nike kut chhuak dik tak inbel tute an hawi hah hah a, chu chu an slogan-in ram a lâkzia lantirtu a ni. Branded rau

rauah Nike kher an thlan lai hian keini kan brand eng nge ni ve le?

Miten Nike kut chhuak dik tak chu ðha turah an ngai a, rintlak leh tloa an ngaih lai hian keini hi eng angin nge min ngaih ve? Kan brand chu KÏP a ni a, kan slogan pawh a tawi ve tek tawh hle mai - 'Rawngbawl tura chhandam' a ni. Mahse engati nge Mizoram takngial pawh kan hneh hleih theih loh ðhin le? Duplicate hi a tam lutuk em ni? KÏP brand chu ðha tur, tlo tur leh rintlak turah miten an ngai ve em?

Kan hahpui leh kan sumdawna, Chanchin ðha hmang hian engati nge thlarau lam market hi kan thunun theih loh? Duh duh titheia inngaia ðhalai tam takte rilru hneh thei tur hian engtianga ringin nge kan slogan hi kan aupui ve dawn le?



### NI TIN NUN HRUAITU ATAN

- ◆ *Mi tin hi harsatna buan mek nei vek kan ni; chuvangin mi chungah ngilneihna thuk ber lantir zel rawh.*
- ◆ *I duhthusam kha thleng ngei tura i duh chuan mu rei ngai suh.*
- ◆ *Eng ang thuamhnaw pawh inbel la, i nungchang kha a pawimawh ber tho.*
- ◆ *I hlim leh hlim loh chu i ngaihtuahna san leh hniamah a innghat.*
- ◆ *Huatna leh itsikna hi phurrit i phurh rit theih ber chu a ni.*
- ◆ *Mahni leh mahni dawt inhrilh hi dawt sawi dan ring ber a ni.*
- ◆ *Huaisen taka bul i ðan ngam loh chuan i hlawhchham der tawh tihna a ni.*
- ◆ *Thil pakhat i neih let ngai tawh loh tur chu i hun hman tawh kha a ni.*
- ◆ *Duhthusam hi thawhrimnain a zui loh chuan awmzia a nei lo.*
- ◆ *I nih tum ni tura beih nan tlai luat a awm lo.*
- ◆ *Nangmah hmangaihtu che chu hmangaih la, a hawtu che chu thuk lehzualin hmangaih rawh.*
- ◆ *Engkim hi chhan nei vekin a thleng tih ring tlat rawh.*
- ◆ *ðhian hi baloon ang a ni. I thlah tawh chuan a rawn let tawh ngai lo vang.*



# KANTU

Hnahthial Br.  
& East Phaileng Br.

## HNAHTHIAL BRANCH

**H**nahthial Branch hi kum 1987, August ni 9-a din a ni a, kumin hi an Silver Jubilee a ni. Member mipa 42 leh hmeichhia 28, an vaiin member 70 an awm mek a, kum 2012 Branch kumpuan atan 'Hun vawn dik' tih an hman mek a ni.

Kum 2012 hian member mipa 42 leh hmeichhia 28, an vaiin member 70 an awm a. Kristian Thalai chanchinbu hi hi copy 38 la mekin copy 1 hi member 1.8 in inchhiartawm ang an ni. An member atangin Missionary 2 an chhuak mek bawk.

Thawhtan zan inkhawm hi sermon inkhawm atan an hman ber a, thla tin Thawhtan zan hnuhnung berah Kum puan zir, Sharing etc. tea hun hman thinn a ni.

Pathianni tlai apiangin Fellowship an nei thinn a, Chawlhni zan inkhawm banah Tawngtai Inkhawm an nei thinn bawk.

Kohhran mi boral an awmin ruang chungah pangpar an dah thinn a, KTP member boral an awm chuan pangpar bakah ruang chungah zaipawlte zai

thinn a ni bawk. Khawhar chhungte hi an chhiattawh atanga chawlhni tlai hmasaberah an inah inkhawm pui thinn a ni bawk. An member damdawi ina awm an awmin KTP hmingin an kan thinn a, tin, an member zirnaa hlawhtling (board exam) an awmin lawmpuina thu ziak hlan thinn a ni. An member Biak In hawnga inneite chu Rs. 500/- man hu lawmpuina thilpek an pe thinn a, member boral chu Rs. 500/- man huin an ral thinn bawk.

Kohhran zaipawl pawh tha takin an kalpui a. Kohhran ni pawimawh hrang hrang Krismas leh Kumthar etc. leh Bial chhung inkhawmpui hrang hrangah pawh inkhawm apiangin an zai thei thinn a, an entawntlak hle a ni.

Kumin hian an Branch project chu Sound Box tha tak neih a ni a, kuminah an nei hman lo a nih pawhin kum thar lamah chuan neih theih ngei an inbeisei a ni...

Sum tuak nan inhlawhna remchang apiangah an inhlawh thinn a, thlakip envelope, Inkhawm thawhlawm, Bawm inleng atang tein sum an tuak thinn a ni ♦



## EAST PHAILENG BRANCH

**E**ast Phaileng Branch hi 15<sup>th</sup> October, 1956 khan din tan niin, member 278 (mipa 190 leh hmeichhia 88) an awm mek a. Branch Kumpulan nei thinin kumin hi "Solfa zir uar kum" atan an puang a. Kumin hian Sub-Committee peng hrang hrang pasarih (7) an nei a, chungte chu :- Programme, K.T.P Eng, Evangelical, Ushering, Decoration, Refreshment, Property te an ni.

Member Missionary-a tlanglai pathum (3) (hmeichhia 3) an awm mek a, Missionary pathum (3) an chawm mek bawk. Chanchinbu 'K.T.P Eng' chu 2002 atang khan Pathianni apiangin an chhuah thin a, Kristian Thalai hi copy 74 an la mek bawk. Kumin Branch Budget atan Rs. 1,75,000/- an ruahman a. Project atan K.T.P In sak that leh Computer (Computer hi lei tawh) an ruahman bawk a ni. K.T.P In luahman, Faith Promise & Spl. Budget, Tukverh Frame & Ventilation siam leh remchang ang ang inhlawhna te hi an sum hmuhna hnar ber a ni.

Kumin hian Branch tichaktu atan Group pathum(3)-ah in thenin a hmung atan an Kohhran Upa boral tawhte hmung Upa Lalduha, Upa Laldailova leh Upa R. Dokhuma te an hmanga, Group tin hian Branch-a chhun luh tur budget Rs 7,500/- theuh an nei a, budget hi an tlak vek tawh a ni. Group te hian theih ang angin sum an tuak thin a, a theih hram chuan thil zuar zawng ni lovin kut hnathawk ngei a sum

tuak an tum thin. Inkhawm/fellowship/hlazir a kal tha te group inel nan hman thin a ni a, kum tawpah lawmman an pe thin a ni.

Thawhtan zanah hian member 78 vel an inkhawm ziah thin a, za zelah 28.02% vel an inkhawm thin. Sermon, Short Sermon, Variety Programme te an hmang thin a. Kohhran zaipawl hi K.T.P ten enkawlin Zaipawl rawngbawl na tha takin an kalpui a, Kohhran hun pawimawh leh hun bikah te an zai thin a ni. Zaipawl hlazir hi mi 60 velin zir ziah ang an ni.

Central K.T.P leh Bial K.T.P in tihtur a tuk te theih ang angin an tihlawhtling thin a, heng tihtur awmte hi rawngbawl na kawnga ti chaktu niin an hria a, lawmawm an ti hle a ni.

Kumin chhung hian Branch hmalakna atan Faith promise night, Group night, Fakna inkhawm, Surprise programme, chawnghei tawngtai leh member tlawhchhuahtein hun an hmang tawh a. Evangelical Sub-committee hmalaknain thlathar thawhtan zan hmasa ber inkhawm banah tawngtairual an nei thin bawk. Member boral an awmin hun remchang hmasa berah inkhawmna neih thin a ni a, member harsatna nei an awmin Branch Committee-in a tul anga buaipui dan a ngaihtuahin theih ang angin an tanpui thin.

An Branch inlungual leh hlim tlang taka Pathian rawng an bawl tlang thei hi an lawm hle a ni. East Phaileng hi Aizawl atanga hmar lam 103 km a awm a ni ♦

# Keimahni



- September 19.2012 khan Champhai Venglai Kohhran Hall-ah SHALOM nen tawngkawpin HIV/AIDS chungchang Training neih a ni a, Bial 9 a tanging mi 29 an tel a ni. Hetah hian Pu Saizamliaana Sailo leh Pu Lalmuanpuia Hrahsel Committee Member-te kalin an ho thei a ni.
- September ni 21-23.2012 chhungin Sialhawk Bial KTP Silver Jubilee, Sialhawk Kohhran Biak Inah an lawm a. Upa Lalrinmuana, General Secretary-in hmanpuuin ni 22.9.2012 (Inrinni) chawhmaah Leadership training neih a ni a, mi 105 lai an tel a ni. Pathianni chawhma Pathian biak inkhawmah thuchah a sawi bawk. Inrinniah Synod choir-in anfin ve leh bawk a ni.
- October 1& 2.2012 chhungin W. Phaileng Branch KTP chuan Diamond Jubilee an lawm a. T. Upa Samuel Vanlalthlanga, Asst. Leader leh NI. Julie Remsangpuiten an hmanpui a ni. Ni .2.10.2012 Chawhma Pathian biak inkhawmah T. Upa Samuel Vanlalthlangan Pathian thuchah a sawi a, an pahnih hian Jubilee dar an vaw ve ve bawk a ni.
- October 1&2.2012 khan Champhai Kahrawt Kohhranah bial huap leadership training neihpui a ni a, training a tel mi 75 an ni. Thawhtan zan Kahrawt Branch inkhawmah Tv. VL Muanchhana, Assistant Secretary-in Pathian thuchah a sawi a, Pu R. Lalhmingthangan Hmunhmeltha Branch inkhawmah a sawi thung a, Hmunhmeltha hian inkhawm banah inkawmkhawmna an neihpui bawk a ni.
- October 5-7.2012 chhungin Guwahati Kohhranah bial huap leadership training neihpui a ni a, training a tel mi 40 an ni. Ni 6.10.2012 (Irinni) zan Pathian biak inkhawmah Pu Samuel Laldinglian Pathian thuchah sawiin ni 7.10.2012 (Pathianni) chawhnuah Upa Zothangzuala Chhange-in a sawi a, Pathianni tlai fellowship-ah thuchahtawi an sawi ve ve bawk a ni.

(Keimahni chhunzawmna....)

■ Interserve nen t̄angkawpin September 22.2012 (Inrinni) khan Synod Conference Centre-ah Tent Making Ministry chungchang Seminar neih a ni a.

Thupui 'Stand Apart' tih niin resource person Eappen John a ni a, Rev. David Lalramliana Ralte-in a t̄awiawm bawk a ni. Hetah hian branch aiawh 103, Central hruaitute 14, chhintu 1, Interserve 2, tel zawng zawng mi 120 an ni. Kulikawn Branch-in reception, ushering leh a t̄ul apiang thawkin minpui bawk a, an chungah kan lawm hle a ni.

■ Branch ding thar :

(1) Vaivakawn Vengthlang Branch : Vaivakawn Bialah Vaivakawn Vengthlang Branch chu August ni 1. 2012 khan a ding thar a, ni 25.9.2012 khan bial Secretary-in registration fee pein a rawn report a ni. Member mipa 75, hmeichhia 66, an vaiin 141 an awm a ni.

(2) Sihphir Venghlun Branch : Sihphir Bial chhungah Sihphir Venghlun Branch chu ni 4 June, 2012 khan a ding thar a, ni 27.9.2012-ah bial Secretary-in registration fee pein a rawn report a ni. Member mipa 139, hmeichhia 79, an vaiin 215 an awm a ni.

Branch ding tharte duhsakna kan hlan e.

